

國朝耆獻類徵初編卷百三十九目錄

郎署一

王樞

李鴻雷

呂慎多

侯方夏

崔掄奇

卜書庫

李雯

胥廷清

蕭家芝

馬光裕

顧子咸

孫宗彝

王培

屈有信

程湛

曹琪

吳宗孟

童欽承

陳天清

侯杲

費國璋
曹鼎臣

唐德亮
鄒象雍

徐越

補錄

李雯

顧予咸

陳天清

國朝耆獻類徵初編卷百三十九

通奉大夫前署江西巡撫江西布政使司布政使湘陰李桓輯

郎署一

王樞

牟平王氏爲儒家世有聞人承德郎府君諱日新由選貢任馬邑令升督糧通判崇祀鄉賢生二子長諱居敬明萬厯庚子舉人其子櫟標孫嗣佐俱舉於鄉標爲崇禎癸酉亞魁次鶴洲翁諱居孜增生鏃礪風節敦篤德義撫按以孝行旌其門娶馬氏無出娶孫氏嫺閨訓生四子長郎芝斗公也公諱樞別號拱如由拔貢考授弘文院中書舍人升工部虞衡清吏司郎中致仕娶何氏甯海衛

遊擊將軍何式之女將軍有知人鑒奇公貌妻以女何歸公克盡
婦道閑家有儀及卒公不再嫡辛卯 覃恩鶴洲翁 贈如公職
兩母俱 贈宜人妻何 封宜人仲楓廩生叔樾庠生季棟皆有
文名公及仲以友恭著東海今夏公終正寢予往哭之越兩月仲
氏來請曰先兄葬有日矣非子莫可屬銘者嗚呼子亦何能已於
銘公歟子弱冠卽與公以文章意氣相取公之生後予三歲義如
雁行然公負性機警敏妙秀丰姿善談笑爽朗如晉人及長乃多
髯精悍復如古俠者當予兩人定交時少年華胄其踔厲豪宕之
槩若將不可羈繼徐而察其所以則內行雍穆規矩整齊一惟鶴
洲翁庭訓是懷承文炳質茂蓋可與爲君子者也崇禎庚辰鶴洲

翁捐館舍公哀毀殮葬盡禮率諸弟侍養孫太宜人甚謹讀禮之
餘兄弟自爲師友臨池俱得義獻家法日夜研鍊帖括作爲文字
如劍之有光玉之有氣晶晶熊熊透映於筆鋒墨瀋之間視彼青
紫直不啻若掇之也而孰知其突出癸未之變哉州城失守公家
罹於難太宜人終命叔季俱被害公偕仲氏萬死僅免兵燹甫定
土寇攘竊棟宇毀圯橫屍衢巷公冒刃蹠血檢收家人遺骸於瓦
礫狼籍中傷哉旣經喪亂門戶益累公捋荼蓄租養生送死備極
拮据且勝朝季世公私多故緩急取裁非公不可州有一事一議
焉州人士莫不曰是惟芝斗在也州有郡之一事一議焉郡人士
莫不曰是惟芝斗在也州有四方之一事一議焉四方人士莫不

曰是惟芝斗在也蓋公生平意度豁達饒權略喜結納海內名流
傾倒者久至止此邦或不過其搢紳先生斷無不於公通殷勤者
大有林宗叔度之目故數年中更流離滄桑而子子子衿全州實
資屏翰焉然猶不廢舉子業學使者試輒優等 國初乙酉秋取
士子及公連榻省邸各抒懷抱交定揣摹頡頏今古談諧閒作往
往燭見跋不倦子心折公才以學達學以年進謂自此不復臥轅
下矣榜放未得志於有司其冬乃以拔貢入監比旋過予宿予呼
之曰髯顧不待科第出身乎公曰唯唯雖然時不恆遇仕不一途
卽上國可雋也況今疆場未靖 聖天子方恢八紘以用才古云
盤根錯節乃別利器此非表見之際乎吾將畢致吾身效尺寸庶

幾追蹤立功名於竹帛者耳亦安能屹屹坐老爲丙戌試京闈復不第丁亥預考中書中選遂入辦事勤敏獨異以其問學 國語

讀 國書輒通曉以精卽久經教習者所不及才名益籍籍綸閣

矣戊子鄭親王奉 命平湖南 世祖章皇帝簡於漢舍人儔中

拔公從征公固素便戎行者也左弭右韃覆盾吮毫軍興旁午肆應捷給王日加器賞焉當其時滿漢雜沓音語難通反側未安玉石易淆蓋生死懸於呼吸榮辱判於指顧矣以公繙譯精熟上下得情所謂民全其命吏存其體者無算而公之積德陰行善於斯乎莫大已師旋升工部虞衡清吏司員外郎理繁鉅剔詭弊堂上諸公率稱之曰能壬辰升郎中差權龍江關革去陋例稅裕課平

商賈今猶德之甲午復命入都忽耳患得請歸里公故不善病以湖南之役地卑溼勞苦深中遂爾神明之用遽奪一竅非重聽者比然公穎性非常客與談者奚童隨具楮管稍書事端早徹首尾中有論難須往復者目瞬頤動心知其故出語相析其節湊不爽銖黍卽揖對上官亦復如是前席抵掌不覺其失聰也故林下二十年州之國計民瘼時有緩急非公更無所取材公亦毅然身任不避迨易簣尙以荒逃未就緒爲慮夫以公之才品在朝廷爲一日不可少之人不幸而病絀其用雖病在州郡四方則仍爲一日不可少之人也故其卒之日遠近聞之無智愚如喪所親如失所倚而痛惜於公之無子且祝望於公之有子也公屢舉子皆

不育以仲氏子嗣伊繼公之畜仲大異他人兄仲之從公亦大異
他人弟每憂公乏親生子勸公廣姬妾邇來公念齒及恐誤人間
有遣者妾孫氏年最少堅誓弗去王子孫有身其冬公感憤疾及
癸丑夏婉期約在旦暮而公疾益劇仲請遺名乃手書曰嗣伯公
卒適八日而嗣伯生仲氏馳使日上春走七十里告子子加額向
天坐客咸起舞曰快哉芝斗有後也或曰使嗣伯早八日而生公
可起子曰數也乃理也公當彌留卽語仲曰厥生必子也厥子必
不及見也公自信之識者亦其信之信於公之義有效於軍國
仁有濟於族里孝友踐其至分而且行陰德於不計報施之地也
數固可由理決者哉公生於明萬厯丁巳年十二月初二日酉時

卒於康熙十二年癸丑四月初六日卯時享年五十有七何宜人
生於萬厯戊午年正月二十日戌時卒於順治十年癸巳六月二
十二日戌時享年三十有五子二人長嗣伊庠生次嗣伯妾孫氏
出以康熙十二年癸丑冬十二月二十五日合元配何宜人葬於
城北先塋之兆域予交公三十餘年堅以性命久以道義自辛亥
就醫二年於外時時念公不置歸趨訊形雖癯神則王也胡遽棄
子乎年後於予予則銘之痛哉銘曰

大業令譽承家在公齡踰日艾耄耄誰同我懷友生蔑此英人式
號且嘻覩此甯馨呱呱而泣雖隔聞聲縣縣瓜瓞夙知命名惟公
克兄懿嗣其宏惟公有弟必玉於成爾伉既偕永裕爾昆勒言貞

珉奕祺常存

右墓誌銘王隲撰

李鴻雷

子與氏有言所謂故國者非有喬木之謂有世臣之謂也予謂不盡於此所謂故國者有老成典刑之謂也大雅蕩之什曰雖無老成人尙有典刑老成人者國之文獻徵焉掌故存焉利害衷焉風俗爲之厚頑懦爲之立焉匪細故也若吾鄉錦秋先生所謂老成典刑非歟先生李氏諱鴻雷字仲默錦秋其別字其先自長山徙新城曾祖九青多隱德享年九十祖進孝稱李長者享年八十有五父采蘭諸生益好行其德享年九十有五 誥封奉政大夫丈夫子三人伯鴻震諸生享年九十季鴻霆順治辛丑舉禮部康熙甲辰 賜進士出身歷官沅江知府先生仲也生而端方嚴介總

角能文章九歲赴試泰安州父執易其少也試以經義立就語多
警策咸嗟異稱聖童十二補諸生時文競尙諸子其甚者旁及釋
典凡南華楞嚴華嚴諸經皆供漁獵先生心非之獨究心二程遺
書朱子語類爲文一根於理甫弱冠已稱大師崇禎壬午舉山東
鄉試 世祖皇帝定鼎急人才徵甲乙科赴選人順治二年乙酉
授隨州知州隨漢東大郡數更闖獻之亂城市爲墟濮州南生魯
洙源爲楚轄問先生曰隨凋瘵極矣子往何以爲政先生對曰布
寬大以集流亡嚴警備以弭盜賊其健訟者必懲主使以絕根株
遺黎其有多乎南公曰善莅隨未幾闖賊餘孽一隻虎者擁眾數
千將犯隨城虛無人眾請避山砦而以城委賊先生毅然不可率

家人胥役閉門登陴發巨礮賊方狐疑進退未決會援兵至遂遁去隨城以全人始有固志未期年盜賊革面流亡漸復汙萊漸闢速訟者咸悔艾爲良人於是修復學校日進諸生講濂洛關閩之學三年報最中丞御史交薦戊子擢順德府同知時天下初定畿南列郡尙多伏莽會姜瓖以大同叛南趨并汾河東大震邢州距三晉數舍日夜纂嚴先生身任城守露宿睥睨樓櫓閒不遑內顧又嚴牌甲譏出入使閒諜不得逞如是者累月姜瓖平始解嚴總督尙書張忠勤公能仁亟稱其功署任縣事均徭役清逋賦吏不敢上下其手舊令候代者三人皆遣之歸繞城壕塹植柳萬株人比於召伯之甘棠時湖南方用兵禁旅日出大名其養馬地也凡

大軍所需餼糧芻茭屢槽棧之屬取辦於直隸河南山東道里
遼闊不能時至當事者又多畏避不敢前滿漢之情不通往往譟
於轅門制府苦之亟召先生計事對曰前此之弊約略有數端立
營之所兵民雜處易於生事一也各屬解饟往往不時至兵有庚
癸之呼二也運官畏旗軍屯糧之地往往去營闊遠軍苦轉運三
也事關三省而司其事者不過府廳以下權輕而威令不行四也
制府曰子往矣是無踰子者先生曰某固言之矣三省之事一府
佐何能爲制府曰假子旗牌如吾自行又戒閫吏曰李郡丞代吾
理軍需朝至朝以入夕至夕以入先生乃諾而出言於制府豫請
主兵者移知旗軍清冊句稽糧草之數豫示以期某日某旗領某